

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 16. jula 2002. godine, i na sjednici Doma naroda, održanoj 18. jula 2002. godine, usvojila je

Z A K O N **O OSIGURANJU DEPOZITA U BANKAMA** **BOSNE I HERCEGOVINE**

I. OPĆE ODREDBE

Član 1. **Okvir primjene**

Zakon o osiguranju depozita Bosne i Hercegovine (u daljem tekstu: Zakon) regulira osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine (u daljem tekstu: Agencija).

Cilj ovog zakona je da osigura, u okviru ograničenja određenih ovim zakonom, zaštitu depozita fizičkih i pravnih osoba u bankama koje su dobile dozvolu za rad od Agencije za bankarstvo Federacije Bosne i Hercegovine (u daljem tekstu: FBA) ili Agencije za bankarstvo Republike Srpske (u daljem tekstu: RSAB) ili nasljednik(a) ovih agencija.

Član 2. **Definicije**

“Agencije za bankarstvo” u smislu ovog zakona predstavljaju FBA ili RSAB ili nasljednik(ci) ovih agencija.

“Fond za osiguranje depozita” (u daljem tekstu: Fond) u smislu ovog zakona je račun Agencije otvoren u skladu sa članom 11. ovog zakona.

“Deponent” u smislu ovog zakona je fizička ili pravna osoba koja ima prikladan depozit u banci članici.

“Prikladan depozit” u smislu ovog zakona je ukupan iznos svih sredstava koji rezultiraju iz depozita, štednih računa ili certifikata banke koje je deponent deponovao u banci članici umanjeno za isključenja iz člana 5. ovog zakona. Prikladni depoziti čine osnovicu za obračun premije osiguranja.

“Entitet” u smislu ovog zakona predstavlja Federacija Bosne i Hercegovine (u daljem tekstu: Federacija) ili Republika Srpska.

“**Vladin organ**” u smislu ovog zakona je domaći ili strani korisnik vladinih sredstava bez obzira na nivo vlasti, tj. da li se radi o državnom, entitetskom, kantonalnom ili općinskom, kao i svako pravno lice uključujući penzione i zdravstvene fondove, koji su u vlasništvu ili pod kontrolom takvih korisnika vladinih sredstava.

“**Grupa**” u smislu ovog zakona je grupa preduzeća koja direktno ili indirektno kontroliraju banku članicu kao i supsidijarna osoba ovih preduzeća i banke članice.

“**Slučaj osiguranja**” u smislu ovog zakona je slučaj koji zahtijeva isplatu osiguranja depozita u skladu s odredbama ovog zakona.

“**Osigurani depozit**” u smislu ovog zakona je dio (najviše 5.000 KM) prikladnog depozita koji je pokriven osiguranjem putem Fonda za osiguranje depozita.

“**Pravna osoba**” u smislu ovog zakona je svaka kompanija, preduzeće, udruženje, ustanova ili fondacija registrirana u BiH izuzimajući vladine organe.

“**Fizička osoba**” u smislu ovog zakona je svaki pojedinac, bez obzira na državljanstvo ili nacionalnost.

“**Banka članica**” u smislu ovog zakona je banka koja učestvuje u programu osiguranja depozita Bosne i Hercegovine u skladu s odredbama ovog zakona.

“**Država**” u smislu ovog zakona je Bosna i Hercegovina.

II. OSIGURANJE DEPOZITA

Član 3. Princip

Agencija osigurava sve prikladne depozite u bankama članicama u Bosni i Hercegovini.

Prilikom slučaja osiguranja, Agencija se obavezuje na naknadu osiguranih depozita dijela prikladnih depozita deponentima u skladu s ograničenjima iz člana 4. i isključenim depozitima iz člana 5. ovog zakona.

Član 4. Ograničenja

Najveći iznos osiguranog depozita, zajedno s obračunatom kamatom, koji isplaćuje Agencija po deponentu po banci članici, iznosi prikladni depozit umanjen za zakonski ili ugovorni dug deponenta prema banci članici ili 5.000 KM ili koji je manji.

Za svrhe isplate, sva sredstva deponenta u stranoj valuti preračunavaju se u KM na osnovu prosječnog deviznog kursa Centralne banke Bosne i Hercegovine (u daljem tekstu: Centralna banka) na dan slučaja osiguranja.

Obračunata kamata na prikladne depozite obračunava se samo do dana slučaja osiguranja.

Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos definiran ovim zakonom po jednom deponentu po banci članici.

Član 5. Isključeni depoziti

Prikladni depoziti ne uključuju slijedeća sredstva :

1. depoziti za koje je odlukom suda utvrđeno da su stečeni protuzakonitim radnjama, i koji nisu predmet dalje žalbe;
2. depoziti koji se drže na računima čiji naziv nije transparentan u smislu vlasništva ili nenominovani depoziti;
3. depoziti koji se čuvaju u sefovima banaka;
4. depoziti koji se čuvaju u aranžmanu pohranjivanja s bankom;
5. depoziti drugih domaćih ili stranih banaka koje drže u svoje ime i za svoj račun;
6. depoziti domaćih ili stranih vladinih organa;
7. depoziti domaćih i stranih osiguravajućih društava ;
8. depoziti domaćih i stranih organa za kolektivna ulaganja;
9. depoziti domaćih i stranih penzionih fondova koji se ne smatraju vladinim organima;
10. depoziti članova nadzornog odbora banke članice, direktora, menadžera, članova odbora za reviziju, vlasnika najmanje 5% kapitala banke članice, osoba odgovornih za provođenje zakonske revizije računovodstvene dokumentacije banke članice i deponentata sličnog statusa u drugim kompanijama iste grupe kao i banka članica;
11. depoziti članova uže porodice, do trećeg stepena vertikalne i bočne linije, osoba navedenih u tački 10. i trećih osoba koje posluju u ime osoba iz tačke 10.;
12. depoziti kompanija iste grupe kao i banka članica;
13. depoziti koje je deponent stekao od iste banke članice prema stopama i/ili drugim finansijskim ustupcima koji su mogli doprinijeti ugrožavanju finansijskog stanja banke članice;
14. depoziti preduzeća koja mogu biti isključena iz pokrića osiguranja nekim posebnim zakonom ili vladinim uputstvom;
15. dugovni vrijednosni papiri koje je izdala banka članica i sve druge obaveze banke članice koje proizilaze iz takvih akceptnih naloga i mjenica.

Član 6. Učešće u članstvu

Sve banke koje su dobile dozvolu za rad od FBA, RSBA ili nasljednika ovih agencija dužne su, u skladu s prijelaznim odredbama ovog zakona i ograničenjima iz člana 7. ovog zakona, postati banke članice.

Agencija mora utvrditi da banka zadovoljava sve zahtjeve ovog zakona, kao i one iz Zakona o bankama Federacije ili Republike Srpske, prije izdavanja certifikata o članstvu toj banci.

U slučaju nastajanja sukoba između Agencije i agencija za bankarstvo u utvrđivanju kvalificiranosti banke za dobijanje ili zadržavanje certifikata o članstvu ili dozvole za rad, zajednička odluka o kvalificiranosti te banke mora se usaglasiti između ovih agencija prije izdavanja ili oduzimanja certifikata o članstvu ili dozvole za rad.

Član 7. Kriteriji za članstvo

Predmet prijelaznih odredbi ovog zakona za učešće u osiguranju depozita kao banka članica, pored dobijanja dozvole za rad od FBA ili RSAB ili njihovih pravnih nasljednika i zadovoljenja odredbi ovog zakona, sve banke članice moraju zadovoljiti i dodatne finansijske kriterije i kriterije vlasništva:

- a) finansijski preduslovi propisani Zakonom o bankama;
- b) privatno vlasništvo od najmanje devedeset procenata.

Osim gore navedenih kriterija, sve banke članice dužne su dodatno zadovoljiti i kriterije sigurnosti i boniteta koje su utvrdile agencije za bankarstvo.

Upravni odbor Agencije jednom godišnje razmatra ovaj zakon u vezi sa Zakonom o bankama Federacije ili Republike Srpske, u svjetlu gore navedenih kriterija, kako bi se zadržala usklađenost ovih zakona.

Član 8. Ugovor o članstvu i certifikat o članstvu

Agencija i svaka banka članica potpisuju ugovor o članstvu koji priprema Agencija u vrijeme kada banka postaje učesnica u Fondu.

Ugovor o članstvu bit će identičan za svaku banku članicu i precizirati prava i obaveze Agencije i banke članice uključujući i odgovarajuće procedure objavljivanja koje Agencija mora poštivati u slučaju isplate osiguranja depozita.

Nova banka članica plaća jednokratnu naknadu za certifikat o članstvu u vrijeme potpisivanja ugovora o članstvu, a Agencija izdaje certifikat o članstvu banci članici u vrijeme potpisivanja ugovora o članstvu. Obje ove aktivnosti moraju se obaviti da bi banka postala banka članica u Fondu.

Upravni odbor Agencije, na prijedlog direktora Agencije, određuje visinu naknade za certifikat za članstvo čija odluka se objavljuje u "Službenom glasniku BiH".

Naknada za certifikat za članstvo koristi se za namirenje troškova nastalih u tekućem odnosu s bankama članicama i bit će u istom iznosu za sve banke članice.

Član 9. Promotivni materijal

Agencija će osigurati promotivni materijal, uključujući i znak Agencije, koji je svaka banka članica dužna otvoreno i u svakom trenutku imati izložen.

Banka članica može također osigurati promotivni materijal koji dokazuje njeno članstvo u osiguranju depozita, pod uslovom da je dizajn materijala kompatibilan sa zvaničnim znakom Agencije.

Dizajn, sadržaj i upotrebu svog promotivnog materijala odobrava Agencija.

Član 10. Premija osiguranja

Nakon izuzeća tačke 14. člana 5. i nakon isključenja sredstava definiranih u ostalim tačkama člana 5. ovog zakona, prosječni prikladni depoziti na kraju svakog mjeseca uvećani za obračunatu kamatu koriste se kao osnovica premije osiguranja banke članice koja učestvuje u osiguranju depozita.

Uplata premije osiguranja vrši se tromjesečno unaprijed do prvog dana svakog tromjesečja, na bazi prosječnog stanja prikladnih depozita u prethodnom tromjesečju. Tromjesečja počinju prvog dana januara, aprila, jula i oktobra.

Agencija svakoj banci članici dostavlja fakturu za uplatu premije osiguranja depozita najkasnije 10 dana prije isteka roka za plaćanje premije.

Ugovor o članstvu definiše procedure za obračun premije koju plaća banka članica.

Upravni odbor Agencije najmanje jedanput godišnje utvrđuje visinu stope premije osiguranja za sve banke članice, na prijedlog direktora Agencije.

Na početku četvrtog kalendarskog tromjesečja, Agencija objavljuje važeću stopu premije osiguranja i stopu koja će se primjenjivati u narednoj kalendarskoj godini. Agencija zadržava pravo izmjene stope u svako doba, u skladu s potrebama Agencije, ali nova stopa premije osiguranja stupa na snagu u narednom kalendarskom tromjesečju nakon obavještanja banaka članica.

Odluka o visini stope premije objavljuje se u "Službenom glasniku BiH" prije nego što izmijenjena stopa premije osiguranja stupi na snagu.

Upravni odbor Agencije ima pravo uspostavljanja sistema rangiranja za svrhe utvrđivanja visine stope premije osiguranja za pojedinačne banke članice proizašle iz tog rangiranja

ili da prihvati, u ovu svrhu, sistem rangiranja koji je uspostavila relevantna agencija za bankarstvo.

Član 11. **Fond za osiguranje depozita**

Agencija otvara račun Fonda u Centralnoj banci i na njega deponuje premije dobijene od banaka članica.

Sredstva premije osiguranja iz člana 10. ovog zakona koristit će se isključivo za povećanje kapitala Fonda.

Fond može prihvatiti i sredstva pribavljena putem donacija koje su predmet odobrenja Upravnog odbora Agencije.

Agencija investira kapital Fonda u skladu s Politikom investiranja koju je donio Upravni odbor Agencije, na prijedlog direktora Agencije (u daljem tekstu: Politika investiranja).

U skladu s odredbama ovog člana, Agencija investira kapital Fonda u vrijednosnice s fiksnim prihodom koje su izdate ili garantirane od zemalja Evropske unije, vladinih agencija zemalja Evropske unije, evropske nadnacionalne agencije, kao i u vrijednosnice s fiksnim prihodom izdate ili garantirane od vlade ili vladinih agencija Sjedinjenih Američkih Država.

Agencija može također ulagati kapital Fonda u vrijednosnice s fiksnim prihodom ili druge instrumente duga koje su izdale banke ili kompanije Evropske unije ili banke ili kompanije sa sjedištem u Sjedinjenim Američkim Državama s najvišom ocjenom. Minimalna ocjena kvaliteta ovih banaka ili kompanija je "A" ili "P 1" i bolja, ili ekvivalent u skladu s ocjenama međunarodno priznate agencije za ocjenu obveznica.

Sve investicije Fonda, u skladu s Politikom investiranja, preduzimaju se uz zaštitu njegovog kapitala i zadržavanja likvidnosti.

Član 12. **Prestanak članstva uz isplatu osiguranja**

12.1 Opće odredbe za prekid članstva uz isplatu osiguranja

Prestanak članstva u programu osiguranja depozita, iz razloga nevezanih za situacije navedene u članu 13. ovog zakona, može proizaći jedino iz aktivnosti na strani agencije za bankarstvo te banke članice.

Nakon zvaničnog obavještenja o gubitku dozvole banke članice ili nakon zvaničnog obavještenja o imenovanju privremenog upravnika, direktor Agencije dužan je o tome obavijestiti Upravni odbor Agencije. Naknadni gubitak članstva u programu osiguranja depozita, iz razloga definiranih u ovom članu ovog zakona, potvrđuje se odlukom

Upravnog odbora Agencije na prijedlog direktora Agencije. Agencija je dužna objaviti odluku u «Službenom glasniku BiH» i dodatno obavijestiti FBA ili RSAB ili njihove nasljednike.

Ukoliko banka članica dobije obavještenje o prekidu njenog učešća u osiguranju depozita iz razloga definiranih ovim članom, banka članica dužna je o tome odmah obavijestiti, zvanično i u pismenoj formi, sve postojeće deponente.

U slučaju isplate osiguranja depozita, prava deponenata, ograničena na iznos isplate osiguranja, zakonski se prenose na Agenciju, na *cessio legis* način.

12.2 Isplata osiguranja depozita ograničava se na slijedeće situacije:

12.2.1 Gubitak dozvole za rad banke članice kao mjera Agencije za bankarstvo

U skladu s odredbama člana 12., kao i ograničenja i isključenja iz članova 4. i 5. ovog zakona, Agencija je dužna isplatiti osigurane iznose prikladnih depozita bez neopravdanog kašnjenja i početi proces isplate najkasnije 60 dana od dana oduzimanja dozvole bivšoj banci članici. Sve isplate naknada za osigurane depozite moraju se završiti u roku 90 dana od dana oduzimanja dozvole banci članici.

12.2.2 Gubitak dozvole za rad banke članice prilikom dobrovoljnog obustavljanja poslovanja banke

Nakon što Agencija za bankarstvo imenuje likvidacionog upravnika za vođenje procesa dobrovoljnog obustavljanja poslovanja banke članice, likvidacioni upravnik, u roku 60 dana, isplaćuje sve prikladne depozite, u cijelosti ili na osnovu proporcionalnosti, ograničene samo na iznos raspoloživih sredstava u banci. Fond nadoknađuje manjak sredstava u isplati osiguranih depozita u skladu s procesom iz stava 2. člana 12.2.2.

U skladu s ograničenjima i isključenjima iz članova 4. i 5. ovog zakona, Agencija je dužna isplatiti sve preostale osigurane iznose prikladnih depozita koji nisu isplaćeni u skladu s odredbom stava 1. člana 12.2.2 bez neopravdanog kašnjenja i početi proces isplate najkasnije 60 dana od dana oduzimanja dozvole bivšoj banci članici u slučaju dobrovoljnog obustavljanja poslovanja banke članice u skladu s odredbama Zakona o bankama. Sve isplate naknada za osigurane depozite moraju se završiti u roku 90 dana od dana oduzimanja dozvole banci članici.

12.2.3 Imenovanje privremenog upravnika u banci članici

U skladu s ograničenjima i isključenjima iz članova 4. i 5. ovog zakona, Agencija je dužna isplatiti osigurani iznos prikladnih depozita bez neopravdanog kašnjenja. U slučaju imenovanja privremenog upravnika u banci članici, proces isplate prvobitno zavisi od preporuke privremenog upravnika i prihvatanja te preporuke od odgovarajuće agencije za bankarstvo.

U toku prvih 60 dana od dana imenovanja privremenog upravnika u banci članici, privremeni upravnik dužan je utvrditi da li je rješenje problema banke članice u toku. Agencija, uz zvanično obavještenje o takvoj situaciji od odgovarajuće agencije za bankarstvo, može odgoditi početak procesa isplate za dodatnih 30 dana u zavisnosti od isplate svih prikladnih depozita od privremenog upravnika, u cijelosti ili na osnovu proporcionalnosti, ograničene na iznos raspoloživih sredstava u banci. Ukoliko se u toku tog perioda od 90 dana utvrdi da će se oduzeti dozvola za rad, i nakon što privremeni upravnik isplati sve prikladne depozite, u cijelosti ili na osnovu proporcionalnosti ograničene samo na raspoloživa sredstva u banci, svaki manjak sredstava u isplati osiguranih depozita nadoknađuje Fond. Sve isplate naknada za osigurane depozite moraju se završiti u roku 150 dana od dana imenovanja privremenog upravnika u banci članici.

12.3 Obaveze deponenata

U svakoj od prethodno opisanih situacija, deponenti su dužni, uz zahtjev za isplatu, dostaviti dokaz zakonskog vlasništva nad depozitom za koji se potražuje naknada.

Bez obzira na razlog isplate osiguranja u banci članici, zahtjevi za isplatu potraživanja deponenata neće se primati protekom roka od 12 mjeseci od dana gubitka dozvole za rad banke članice.

Član 13.

Suspenzija ili okončanje članstva bez isplate osiguranja

13.1 Opće odredbe za suspenziju ili okončanje osiguranja depozita

Suspenzija ili okončanje članstva u programu osiguranja depozita, iz razloga nevezanih za situacije navedene u članu 12. ovog zakona, može proizaći jedino iz odluke Upravnog odbora Agencije na prijedlog direktora Agencije. Agencija je dužna zvanično obavijestiti FBA ili RSAB ili njihove nasljednike i objaviti odluku u “Službenom glasniku BiH”.

Banka članica koja je obaviještena da joj je status banke članice suspendiran ili okončan daje javno obavještenje, konvencionalnim metodama publikacija i izvještavanja, da novi depoziti koje banka bude primala neće biti osigurani.

Agencija daje obavještenje konvencionalnim metodama publikacije i izvještavanja 10 dana prije stvarne suspenzije ili okončanja osiguranja depozita u banci članici čije se osiguranje depozita suspendira ili okončava iz razloga drugačijih od onih iz člana 12. ovog zakona. Ovo obavještenje također se objavljuje u “Službenom glasniku BiH”.

U slučaju suspenzije ili okončanja učešća banke članice u osiguranju depozita, odluka Agencije je konačna i obavezujuća i može se osporavati u postupku pred Sudom Bosne i Hercegovine.

13.2 Suspenzija osiguranja depozita bez isplate osiguranja

Suspenzija osiguranja depozita ograničava se na situacije neplaćanja naknade za članstvo od strane banke članice ili neplaćanja premije osiguranja za jedno tromjesječje.

Depoziti primljeni prije dana suspenzije osiguranja depozita, u skladu s ovim članom, ostaju osigurani na slijedeći način:

- a) 90 dana nakon suspenzije osiguranja depozita, ili
- b) do dana dospijeca pojedinog depozita, u zavisnosti koji je rok duži.

Ovi će depoziti biti osigurani na istom nivou od dana kada je banka članica bila obaviještena o suspenziji njenog osiguranja depozita.

Novi depoziti, ili dodatna sredstva koja su dodata postojećim kvalifikovanim depozitima, koji su primljeni poslije dana kada je banka članica obaviještena o suspenziji osiguranja, neće biti osigurani.

Od banke članice zahtjeva se da poslije dana suspenzije depozita nastavi plaćati premiju Agenciji dok god postoji osiguranje depozita zbog dospijeca depozita, a iznos premije zasnivati će se samo na onim depozitima koji su osigurani.

Banka članica mora vratiti Agenciji svoj originalni certifikat o članstvu u roku od pet radnih dana od dana kada je primila obavještenje o suspenziji svojih depozita. Ako banka članica ponovo uspostavi svoje učešće u osiguranju depozita prije ukidanja njenog članstva u osiguranju depozita, originalni certifikat o članstvu bit će vraćen ponovno primljenoj banci članici bez potpisivanja novog ugovora o članstvu ili procjene nove naknade za certifikat.

13.3 Ukidanje osiguranja depozita bez isplate osiguranja

Ukidanje osiguranja depozita ograničava se na situacije neplaćanja premije osiguranja od banke članice više od jednog uzastopnog kvartala.

Depoziti primljeni prije dana ukidanja osiguranja depozita shodno ovom članu i dalje će biti osigurani prema odredbama i ograničenjima stava 13.2 ovog člana.

Ako banka članica vrati svoje članstvo u osiguranju depozita ali samo poslije ukidanja njenog učešća u osiguranju depozita, originalni certifikat o članstvu neće biti vraćen ponovno primljenoj banci članici već će se izdati novi certifikat o članstvu i procijenit će se naknada za certifikat o članstvu.

13.4 Okončanje osiguranja depozita u slučaju nametanja vanjskih mjera

Za slučaj da bilo koja odluka ili aktivnost stranog ili državnog organa ili tijela ili organizacije dovede do prekida rada banke članice iz razloga koji ne predstavljaju kršenje

odredaba važećeg zakona o bankama ili ovog zakona, Agencija neće isplatiti osiguranje depozita za osigurani dio prikladnih depozita te banke članice.

III. AGENCIJA ZA OSIGURANJE DEPOZITA

Član 14. Uspostavljanje

Ovim zakonom osniva se Agencija za osiguranje depozita Bosne i Hercegovine koja se sastoji od sjedišta Agencije i filijale u svakom entitetu. Agencija može otvoriti dodatne organizacione jedinice u drugim gradovima države, ali samo ako su predložene organizacione jedinice fiskalno održive od dana njihovog otvaranja.

Filijale ili druge organizacione jedinice nemaju pravni status niti ovlaštenja neovisno od Agencije. Svaka dodatna organizaciona jedinica Agencije osniva se jedino odlukom Upravnog odbora Agencije i Upravni odbor Agencije imenuje direktore svih organizacionih jedinica Agencije.

Agencija je samostalna, neprofitna pravna osoba s punim ovlaštenjem u skladu sa zakonom države. Naročito, Agencija ima ovlaštenje za sklapanje ugovora, nabavku i raspolaganje pokretnom i nepokretnom imovinom i da bude strana u pravnom procesu.

Sjedište Agencije je u Banja Luci, s filijalama u Sarajevu i Banja Luci. Agencija može svoje funkcije na nivou Agencije dodijeliti između lokacija filijala.

Agencija ima pečat koji sadrži naziv Agencije i grb države. Sjedište i svaka filijala imaju identičan pečat koji sadrži tekst: "Agencija za osiguranje depozita Bosne i Hercegovine", ime i lokaciju te filijale što je i jedina dozvoljena razlika u dizajnu pečata. Pečati Agencije i njenih filijala sadrže identičan grb u skladu sa Zakonom o grbu Bosne i Hercegovine.

Član 15. Obaveze i ovlasti

Osnovni zadaci Agencije su:

- a) osiguranje prikladnih depozita fizičkih i pravih osoba u bankama članicama u skladu s ovim zakonom;
- b) izdavanje certifikata o članstvu bankama koje zadovoljavaju kriterije za učešće u programu osiguranja depozita;
- c) oduzimanje, putem suspenzije ili okončanja, certifikata o članstvu;
- d) investiranje sredstava koja čine Fond za osiguranje depozita u skladu s ograničenjima Politike investiranja Agencije i u skladu s ovim zakonom;
- e) isplata osiguranja depozita u slučaju prestanka rada banke članice u skladu s ovim zakonom; i
- f) donošenje podzakonskih akata kojima se regulira osiguranje depozita i poslovanje Agencije u skladu s ovim zakonom.

U slučaju da se Agencija i banka članica ne mogu usaglasiti u vezi sa tačnošću izvještaja potrebnih u skladu s ovim zakonom ili odlukom Upravnog odbora Agencije, Agencija ima pravo zahtijevati reviziju poslovanja banke članice i angažirati nezavisnog revizora radi ocjene tačnosti izvještaja koje je banka članica dostavila Agenciji. Troškove ove revizije snosi ona strana čije se tumačenje ocjenom revizije utvrdi kao pogrešno.

Kada Agencija ocijeni da banka članica ne ispunjava obavezu plaćanja premije osiguranja Agenciji ili ne ispunjava druge finansijske obaveze prema Agenciji, Agencija ima pravo da:

- a) zvanično obavijesti FBA ili RSAB ili njihove nasljednik(e) da Agencija planira da preduzme mjere u vezi s aktivnosti banke članice ili stanja koje može uticati na članstvo te banke u Fondu;
- b) podnese tužbu nadležnom sudu;
- c) uvede proces suspenzije ili okončanja u skladu s članovima 12. i 13. ovog zakona.

Agencija ima pravo provjere svih ili pojedinih prikladnih depozita u svojim bankama članicama i može tražiti podatke o prikladnim depozitima pismenim putem. Banka članica dužna je potvrditi prijem zahtjeva u roku dva radna dana i postupiti po zahtjevu za informacijama o depozitima u roku 10 radnih dana.

Član 16. Samostalnost i imunitet

Agencija samostalno rukovodi svojim poslovanjem prema opisu svojih djelatnosti i u skladu s ovim zakonom.

Od dana osnivanja Agencije direktor Agencije, direktori filijala i njihovo osoblje, kao i druga lica preporučena ili imenovana od Agencije za obavljanje određenih radnji u okviru ovog zakona, ne mogu se goniti u krivičnom ili građansko-pravnom postupku za bilo koje radnje koje su izvršili u dobroj namjeri i u skladu s ovim zakonom, tokom izvršenja ili provođenja zadataka u okviru svojih ovlaštenja.

Agencija snosi troškove ili iste naknađuje za svoje uposlenike, bez obzira na položaj, za sve pravne sporove inicirane protiv uposlenog, iz bilo kog izvora, za radnje preduzete u dobroj namjeri prilikom izvršenja ili provođenja zadataka u okviru ovlaštenja propisanih ovim zakonom ili drugih delegiranih ovlaštenja ukoliko ti troškovi ne mogu biti naplaćeni od strane(a) koje su podnijele tužbu protiv Agencije ili njenog osoblja .

Član 17. Statut Agencije

Statutom Agencije naročito se uređuju:

- a) organizacija i način poslovanja Agencije;
- b) nadležnost i način rada Agencije;
- c) ovlaštenja za sva zastupanja Agencije;
- d) prava, obaveze i odgovornosti osoba koje obavljaju poslove i zadatke sa posebnim ovlaštenjima i odgovornostima; i
- e) druga organizaciona pitanja u vezi s poslovanjem Agencije.

Upravni odbor obavezno razmatra Statut Agencije, jednom godišnje, radi eventualnog usklađivanja s izmjenom propisa, koji direktno ili indirektno utiču na ovaj zakon.

Član 18. **Upravni odbor**

18.1 Sastav

Jedini organ upravljanja Agencijom je Upravni odbor.

Upravni odbor sastoji se od pet članova. Sastav i izbor članova Upravnog odbora propisan je ovim zakonom.

Guverner Centralne banke, ili osoba koju on imenuje je *ex officio* član Upravnog odbora, a ministar trezora institucija Bosne i Hercegovine, ili osoba koju on imenuje, je *ex officio* član Upravnog odbora.

Upravni odbor Centralne banke ima pravo imenovati jednog člana Upravnog odbora i u skladu s ograničenjima odgovarajućih zakona svakog entiteta, ministar finansija Federacije i ministar finansija Republike Srpske imaju pravo imenovati jednog člana Upravnog odbora iz njihovih entiteta.

Članovi Upravnog odbora koji to nisu *ex officio*, moraju biti osobe koje su stekle visok ugled finansijskog i bankarskog stručnjaka i koje posjeduju visoke moralne osobine za vršenje povjerenih im dužnosti.

Upravni odbor bira predsjedavajućeg i zamjenika predsjedavajućeg iz reda svojih članova. Direktori Agencija za bankarstvo u slučaju da budu imenovani u ovaj Upravni odbor od jedne strane s pravom imenovanja, ne mogu služiti kao predsjedavajući ili zamjenik predsjedavajućeg Upravnog odbora.

Pojedinci koji su predloženi za članove Upravnog odbora moraju predložiti pismenu izjavu kao dokaz njihove kvalificiranosti i potvrdu prihvatanja u slučaju njihovog imenovanja.

Mandat članova Upravnog odbora, koji su imenovani na osnovu ovlaštenja položaja navedenog u ovom članu, isključujući članstva posebno uspostavljena na *ex officio* osnovi u skladu s ovim zakonom, je pet godina.

Svaka osoba, osim članova koji su *ex officio* članovi, može biti imenovana za člana Upravnog odbora Agencije, samo na dva uzastopna mandata tako da prilikom imenovanja za slijedeći mandat, najmanje dva člana iz prethodnog saziva Upravnog odbora budu imenovana.

Članovi Upravnog odbora ne mogu biti međusobno povezani, ili povezani s direktorom Agencije ili direktorima organizacionih jedinica, krvno ili u braku, zaključno s trećim stepenom srodstva.

Članovi Upravnog odbora ne mogu za vrijeme svog mandata imati izvršnu vlast ili biti članovi nadzornog ili upravnog odbora banke članice ili bilo koje druge banke u državi koja ima dozvolu za rad .

Članovi Upravnog odbora ne mogu posjedovati direktno ili indirektno više od pet procenata kapitala banke članice te su dužni obavijestiti Upravni odbor u pismenoj formi o interesima koje imaju u banci članici oni lično ili neko s njima povezan, krvno ili u braku, zaključno s trećim stepenom srodstva .

Članovi Upravnog odbora dužni su obavijestiti Agenciju u pismenoj formi o interesima koje imaju oni ili s njima povezane osobe, krvno ili u braku, zaključno s trećim stepenom srodstva, u nekoj drugoj banci ili komercijalnom preduzeću u kojem posjeduju više od pet procenata kapitala banke ili preduzeća.

18.2 Smjenjivanje, suspenzija i otpuštanje članova

Većina članova Upravnog odbora ima pravo smijeniti člana Upravnog odbora u slučaju krivičnog ili nezakonitog postupanja kršenjem ili u suprotnosti s pravilima obavljanja dužnosti u vezi s radom u Upravnom odboru. Naknadno imenovanje pojedinca za upražnjeno mjesto bit će obavljeno u skladu s ovim zakonom vezano za ovlaštenja imenovanja u članstvo za mjesto smijenjenog člana.

Dužnost je i obaveza Upravnog odbora da obavijesti Vijeće ministara Bosne i Hercegovine o krivičnom ili nezakonitom postupanju bilo kojeg člana Upravnog odbora.

Član Upravnog odbora za slučaj ponašanja suprotno posljednja četiri stava člana 18.1 ovog zakona automatski se suspendira s dužnosti.

Svaki član Upravnog odbora odgovoran je za obavještanje Upravnog odbora o svom statusu iz posljednja četiri stava člana 18.1 ovog zakona.

Za vrijeme obavljanja dužnosti u Upravnom odboru, članovi Upravnog odbora ne mogu biti gonjeni u krivičnom ili građansko-pravnom postupku, za aktivnosti koje su preduzeli u skladu s ovim zakonom i u dobroj namjeri u skladu s njihovim dužnostima kao članovima Upravnog odbora.

Član Upravnog odbora Agencije može biti razriješen dužnosti prije isteka mandata na lični zahtjev.

Osoba imenovana umjesto člana koji je smijenjen, suspendiran ili razriješen dužnosti, obavlja dužnost član Upravnog odbora do isteka mandata njegovog prethodnika.

18.3 Sjednice

Sjednice Upravnog odbora mogu se održavati na *ad hoc* osnovi, ali se moraju održavati najmanje jedanput svakog kalendarskog tromjesječja.

Upravni odbor napraviti će raspored svojih sastanaka kako bi se osiguralo da se sastanci održavaju redovno, naizmjenično na lokacijama organizacionih jedinica Agencije.

Sjednice Upravnog odbora saziva predsjedavajući. Predsjedavajući također saziva posebnu sjednicu na zahtjev direktora Agencije ili na zahtjev dva člana Upravnog odbora, najkasnije 14 dana od dana primanja zahtjeva, u suprotnom osoba koja je podnijela zahtjev ovlaštena je da sazove posebnu sjednicu.

Pismeni poziv za sjednicu Upravnog odbora, koji sadrži datum, vrijeme početka, mjesto održavanja sjednice i dnevni red dostavlja se članovima Upravnog odbora najkasnije sedam dana prije održavanja sjednice. Materijal za svaku tačku dnevnog reda prilaže se uz poziv na sjednicu.

Osobe koje nisu članovi Upravnog odbora mogu prisustvovati sjednici ali samo uz pismeni poziv predsjedavajućeg.

Za održavanje sjednice Upravnog odbora potreban je kvorum većine ukupnog broja članova. Upravni odbor donosi odluke na osnovu većine glasova ukupnog broja članova.

Predsjedavajući ili član Upravnog odbora ne glasa za pitanja vezana za njega lično.

Direktor Agencije i direktori filijala prisustvuju svim sjednicama Upravnog odbora, bez prava glasa.

Predsjedavajući može odrediti da direktor Agencije i direktor(i) filijala ne prisustvuju sjednici Upravnog odbora, ali mora u tom slučaju obrazložiti takvu odluku direktoru Agencije i direktoru(ima) filijala, kao i Upravnom odboru.

Upravni odbor Agencije, na prijedlog direktora Agencije, može imenovati savjetnike Upravnog odbora. Savjetnici se imenuju iz banaka, Udruženja banaka ili donatora.

Osim toga, svaka agencija donator ili zemlja donator, strana ili domaća, može imenovati savjetnika Upravnog odbora Agencije. Prava i obaveze savjetnika reguliraju se sporazumom između Agencije i zemlje donatora ili agencije donatora.

18.4 Zadaci

Upravni odbor naročito:

1. imenuje direktora Agencije i direktore filijala Agencije;
2. bira predsjedavajućeg i zamjenika predsjedavajućeg Upravnog odbora;
3. donosi Statut Agencije i druge opće akte;
4. donosi sve propise, politike, uputstva i naknade za upravljanje i poslovanje Agencije i njenog Fonda u skladu s ovim zakonom, zakonima države ili u skladu s praksom zdravog upravljanja;
5. pregleda godišnje ovaj zakon u vezi sa Zakonom o bankama;
6. utvrđuje i odobrava stručnu kvalificiranost direktora Agencije i direktora filijala;
7. odobrava, na prijedlog direktora Agencije, učešće banaka u članstvu i prekide članstva banaka članica;
8. donosi finansijski plan Agencije na prijedlog direktora Agencije;
9. donosi Politiku investiranja Fonda na prijedlog direktora Agencije;
10. donosi, na prijedlog direktora Agencije, odluku o visini stope premije osiguranja koja se naplaćuje od banaka članica;
11. donosi odluku o davanju prijedloga Vijeću ministara Bosne i Hercegovine o izmjeni iznosa pokrića osiguranja prikladnih depozita na inicijativu direktora Agencije;
12. donosi odluku o visini naknade za certifikat u članstvu za banke članice, a na prijedlog direktora Agencije;
13. odobrava plaće i beneficije za sve uposlene u Agenciji, a na prijedlog direktora Agencije, ako nije drugačije propisano državnim zakonom ili propisom;
14. donosi sve potrebne propise i uputstva o radu samog Upravnog odbora;
15. godišnje odobrava imenovanje vanjskog revizora Agencije, a na prijedlog direktora Agencije;
16. donosi odluku o imenovanju nezavisnog revizora u slučaju sukoba s bankom članicom u vezi s tačnošću izvještaja u skladu s ovim zakonom;
17. osniva i imenuje članove Komisije za prekršaje Agencije;
18. donosi Pravilnik za vođenje prekršajnog postupka.

18.5 Izvještavanje

Upravni odbor odgovoran je za aktivnosti Agencije.

Upravni odbor Agencije dužan je usvojiti godišnji izvještaj o radu i finansijski plan za narednu godinu u roku od tri mjeseca po završetku prethodne kalendarske godine i u tom roku ga dostaviti na objavljivanje "Službenom glasniku BiH".

Upravni odbor dostavlja kopiju svog godišnjeg izvještaja o radu i svog finansijskog plana Predsjedništvu BiH kao informaciju u roku tri mjeseca od završetka prethodne kalendarske godine.

Član 19. **Direktor i direktori filijala**

19.1 Imenovanje

Upravni odbor imenuje direktora i direktore filijala Agencije na period od pet godina. Direktor i direktori filijala mogu biti ponovo imenovani od Upravnog odbora bez ograničenja na broj imenovanja, ali se proces potvrde mora ponoviti prilikom svakog imenovanja.

Upravni odbor dužan je imenovati direktora ili direktore filijala Agencije u roku od 60 dana nakon što jedna od pozicija ostane upražnjen.

U slučaju da direktor ili direktori filijala nisu imenovani od Upravnog odbora u datom roku, predsjedavajući Upravnog odbora imenuje direktora ili direktore filijala, kako odgovara, privremeno do imenovanja od Upravnog odbora.

Direktor ili direktori filijala, imenovani u smislu prethodnog stava, imaju puna ovlaštenja tih pozicija u skladu s odredbama ovog zakona.

Direktor i direktori filijala ne mogu sami biti članovi nadzornog ili upravnog odbora banke članice ili neke druge banke ili nekog njima vezanog, krvno ili u braku, do trećeg stepena srodstva.

Direktor ili direktori filijala ne mogu posjedovati, sami ili neko s njima vezan, krvno ili u braku, do trećeg stepena srodstva, direktno ili indirektno više od pet procenata kapitala banke članice.

Direktor i direktori filijala dužni su pismeno obavijestiti Agenciju o interesima koje oni sami ili neko s njima vezan, krvno ili u braku, do trećeg stepena srodstva, imaju u banci članici ili nekoj drugoj banci ili komercijalnom preduzeću, u kojem posjeduju udio u kapitalu banke ili posjeduju više od pet procenata kapitala preduzeća, ili o članstvu u nadzornom ili upravnom odboru komercijalnog preduzeća.

Direktor i direktori filijala neće prihvatiti položaj u banci članici u roku dvije godine nakon završetka zaposlenja u Agenciji bez prethodnog pismenog odobrenja Upravnog odbora Agencije.

19.2 Zadaci

Direktor Agencije predstavlja i zastupa Agenciju, rukovodi radom Agencije i odgovoran je za poslovanje Agencije.

Direktor Agencije vrši slijedeće:

- a) predlaže Upravnom odboru učešće banke u članstvu ili prestanak članstva banke članice;
- b) predlaže Upravnom odboru sva pojedninačna akta vezano za banke članice;
- c) predlaže Upravnom odboru sva opća akta, pravila, uputstva o bankama članicama;
- d) predlaže Upravnom odboru finansijski plan Agencije i politiku investiranja sredstava Fonda;
- e) zastupa Agenciju u odnosima s bankama članicama i svim drugim institucijama;
- f) provodi sve politike i odluke koje je donio Upravni odbor;
- g) utvrđuje i odobrava odgovarajuću stručnu kvalificiranost osoblja Agencije ispod nivoa direktora filijala;
- h) odlučuje o zasnivanju i prestanku radnog odnosa svih uposlenih ispod nivoa direktora organizacionih jedinica uz konsultacije s direktorima filijala, u skladu s državnim zakonom ili propisom;
- i) predlaže Upravnom odboru Agencije plaće i beneficije za sve uposlene Agencije, u skladu s državnim zakonom ili propisom;
- j) najmanje jedanput godišnje razmatra visinu stope premije osiguranja koja se naplaćuje bankama članicama i daje Upravnom odboru prijedlog u vezi s njom;
- k) predlaže Upravnom odboru Agencije izbor vanjskog revizora Agencije;
- l) predlaže Upravnom odboru Agencije izbor nezavisnog revizora u slučaju sukoba s bankom članicom u vezi s tačnošću izvještaja, a u smislu ovog zakona;
- m) pokreće inicijativu prema Upravnom odboru na planu zakonske izmjene iznosa pokriva osiguranog depozita.

Direktori filijala Agencije rukovode i organiziraju rad filijala i pomažu direktoru Agencije u obavljanju njegovih dužnosti iz prethodnog stava, a jedan od direktora filijala vrši dužnost direktora kada mu direktor prenese to ovlaštenje u slučaju službenog odsustva direktora. Bilo koji posao iz prethodnog stava direktor može prenijeti na direktore filijala kao pojedinačno ovlaštenje ili kao ovlaštenje koje on dijeli s direktorom.

Sva ovlaštenja koje direktor prenese na direktore filijala prenose se u pismenoj formi. Svako ovlaštenje može se povući u bilo koje vrijeme uz stupanje na snagu odmah uz odgovarajuće pismeno obavještenje. Direktor Agencije može prenositi svoja ovlaštenja samo na direktore filijala.

Direktor je obavezan kontinuirano informirati direktore filijala o svim aspektima poslovanja Agencije, kako bi direktori filijala mogli preuzeti obaveze direktora u skladu s stavom 4. ovog člana.

Direktor i direktori filijala učestvuju u radu Upravnog odbora ali nemaju pravo glasa u Upravnom odboru.

Direktor i direktori filijala su za svoj rad odgovorni Upravnom odboru.

Direktor Agencije konsultuje se s direktorima filijala, kao i s drugim odgovarajućim osobljem Agencije prilikom donošenja odluka u vezi s poslovanjem Agencije ili pripreme prijedloga Upravnom odboru Agencije. Sve odluke i prijedlozi predstavljaju konačno ovlaštenje i odgovornost direktora Agencije.

Član 20. **Poslovna tajna Agencije**

Članovi Upravnog odbora Agencije, direktor i direktori filijala kao i svi uposleni Agencije, te sve druge osobe koje je angažirala Agencija u svom poslovanju i sve druge osobe koje obavljaju poslove na kratkoročnoj osnovi, obavezni su čuvati, kao poslovnu tajnu, sve informacije do kojih dođu u okviru svog posla.

Obaveza iz stava 1. ovog člana traje i po prestanku radnog odnosa, angažmana ili članstva u Upravnom odboru ili zaposlenja bilo koje vrste u Agenciji.

Jedino Agencija može odobriti otkrivanje poslovne tajne u krivičnom postupku pred nadležnim sudom za osobe iz stava 1. ovog člana.

Član 21. **Finansiranje Agencije**

Operativni troškovi Agencije finansiraju se iz prihoda od naknada i prihoda od investicija kapitala Fonda.

Sredstva s operativnog računa Agencije mogu se koristiti isključivo za operativne troškove Agencije, a sredstva koja čine račun Fonda mogu se koristiti jedino za isplatu osiguranja depozita u slučaju isplate osiguranja.

Za finansiranje operativnih troškova Agencije mogu se koristiti sredstva iz donacija. Za sve donacije i sve uslove vezane za njih, koji nisu uključeni u odobreni finansijski plan Agencije, potrebno je odobrenje Upravnog odbora Agencije.

Godišnje, višak prihoda nad rashodima Agencije dobijenih iz izvora iz stava 1. i 2. ovog člana, raspoređuju se u Fond odlukom Upravnog odbora na prijedlog direktora Agencije.

Sve premije koje uplaćuju banke članice dodaju se Fondu.

U situaciji kada korištenje prihoda Agencije u skladu sa stavovima 1. i 2. ovog člana nisu dovoljni za finansiranje operativnih troškova Agencije, Upravni odbor, na prijedlog direktora Agencije, može donijeti odluku o privremenoj upotrebi uplata premija osiguranja u svrhu osiguranja potrebnih sredstva. Ovakva odluka ne može važiti za period duži od godinu dana u kom roku se privremeno upotrebljena sredstva vraćaju u Fond i primjenjuje se samo ako je Agencija iscrpila sve praktične načine umanjenja operativnih troškova.

Za slučaj kada Fond nije dostatan za ispunjenje obaveza Agencije u vezi s isplatom osiguranog depozita, a sve odredbe ovog člana su iscrpljene, Agencija, u okviru ograničenja zakona države, može osigurati kredite i garancije za osiguranje potrebnih sredstava. U tom slučaju, Upravni odbor Agencije, na prijedlog direktora Agencije, može odobriti upotrebu budućih potraživanja premije osiguranja kao garanciju i budućih naplata premija osiguranja kao izvor otplate duga Agencije.

Član 22. **Saradnja s agencijama za bankarstvo**

Agencija je dužna, na osnovu pismenog zahtjeva, dostaviti agencijama za bankarstvo ili nekoj drugoj državnoj agenciji informacije do kojih Agencija dođe u skladu s ovim zakonom.

Agencija se ne može smatrati odgovornom za aktivnosti koje preduzmu agencije za bankarstvo ili neka druga vladina agencija na osnovu informacija koje je dostavila Agencija iz stava 1.

Agencije za bankarstvo i druge državne institucije dužne su, na osnovu uzajamnosti, pružiti Agenciji svu potrebnu saradnju kako bi Agencija mogla ostvarivati svoje odgovornosti u skladu s ovim zakonom, naročito sa svrhom da Agencija, na osnovu pismenih zahtjeva, dobije sve potrebne standardizirane izvještaje od agencija za bankarstvo.

Agencija ne može smatrati agencije za bankarstvo ili neku drugu državnu agenciju odgovornom za odluku koju je donijela Agencija na osnovu materijala koje je primila od tih agencija.

Agencija ima zakonsko pravo da očekuje da je agencije za bankarstvo obavijeste o aktivnostima koje su preduzele agencije za bankarstvo kao odgovor na akcije planirane od Agencije i koje je Agencija predožila agencijama za bankarstvo ili koracima koje su planirale same agencije za bankarstvo.

Agencija, u skladu s kriterijima izvještavanja koje su propisale agencije za bankarstvo, propisuje način vođenja evidencije depozita u bankama članicama radi izvještavanja o relevantnim podacima Agenciji.

Član 23. **Saradnja sa Centralnom bankom**

Agencija je dužna da, na osnovu pismenog zahtjeva, Centralnoj banci dostavlja informacije do kojih je došla u okviru ovlaštenja propisanih ovim zakonom.

Agencija se ne može smatrati odgovornom za bilo kakve radnje koje Centralna banka preduzme na osnovu informacija koje joj dostavi Agencija.

Član 24. **Sankcije**

Agencija može nametnuti, putem Komisije za prekršaje, novčanu kaznu od 1.000 KM do 50.000 KM banci članici ako:

1. neblagovremeno dostavlja izvještaje Agenciji;
2. ne uplaćuje premije osiguranja po dospijeću;

3. ne plaća naknadu za izdati certifikat;
4. ne istakne znak Agencije i promotivni materijal kao dokaz o članstvu u programu osiguranja depozita;
5. odbije pristupiti ugovoru o osiguranju depozita;
6. namjerno dostavi Agenciji netačne informacije;
7. ukoliko ne postupa u skladu s odredbama ovog zakona.

U slučaju tački 1., 6. i 7. ovog člana može se propisati novčana kazna u srazmjeri s visinom pričinjene štete ili neizvršene obaveze najviše do dvadesetostrukog iznosa pričinjene štete ili neizvršene obaveze koja je predmet prekršaja. Osim toga, kaznit će se i direktor banke članice novčanom kaznom od 200 KM do 5.000 KM.

Sve novčane kazne propisane u ovom članu plaćaju se u državni budžet.

Član 25. Prekršajni postupak

Prekršajni postupak vodi Komisija za prekršaje (u daljem tekstu: Komisija).

Prekršajni postupak vodi se u skladu s Pravilnikom za vođenje prekršajnog postupka, koji će donijeti Upravni odbor Agencije, najkasnije 60 dana od dana stupanja na snagu ovog zakona. Pravilnik će se, po donošenju, objaviti u "Službenom glasniku BiH»
Komisija se sastoji od tri člana i istog broja zamjenika sličnih kvalifikacija koje imenuje Upravni odbor Agencije iz reda uposlenih Agencije. Upravni odbor propisat će uslove za stručnu kvalificiranost članova Komisije.

Komisija u prekršajnom postupku donosi rješenje, protiv kojeg se može izjaviti žalba Sudu Bosne i Hercegovine.

Član 26. Prestanak rada Agencije

U slučaju da Agencija obustavi poslovanje iz razloga koji nije vezan za obavezu isplate osiguranja, sredstva Agencije raspoređuju se na slijedeći način:

- a) isplata svih zakonskih obaveza Agencije, uključujući neplaćene plate i beneficije uposlenih;
- b) do raspoloživog iznosa, vrši se povrat sredstava donatorima do visine glavnice njihovih donacija ili na osnovu proporcionalnosti ukoliko se ne mogu vratiti glavnice svih doniranih sredstava;
- c) sva preostala sredstva moraju se vratiti bankama članicama na osnovu proporcionalnosti za uplaćene premije banaka članica.

Upravni odbor Agencije može preuzeti radnje reorganizacije organizacionog i poslovnog aranžmana Agencije, ali samo uz izmjenu ovog zakona u dijelu ili cjelokupno. Ukoliko dođe do takve situacije, Agencija nastavlja svoje poslovanje na način propisan ovim zakonom i sve ove izmjene koje treba da stupe na snagu zbog nastale promjene u

organizacionom poslovanju Agencije, Agencija šalje u državnu zakonodavnu proceduru u roku od šest mjeseci od dana kada je Upravni odbor Agencije odobrio organizacioni i poslovni aranžman Agencije.

IV. PRIJELAZNE I ZAVRŠNE ODREDBE

Član 27. Prenos prava i obaveza

Od dana stupanja na snagu ovog zakona, sredstva, prava i obaveze Agencije za osiguranje depozita u Federaciji i Agencije za osiguranje depozita u Republici Srpskoj prenose se na ovu agenciju koja je pravni nasljednik ovih prethodnih agencija.

Član 28. Registriranje Agencije

Kada god zakon države to dozvoljava, Agencija mora, u roku šest mjeseci od dana stupanja na snagu zakona koji to omogućava, biti registrirana kod nadležnih vlasti kako bi ostvarila svoj samostalni zakonski status.

Član 29. Konačni datum za članstvo u osiguranju depozita

Banke članice koje imaju dozvolu za rad od FBA moraju do 31. decembra 2002. godine ili dana naknadno utvrđenog zakonom, ispuniti sve zahtjeve Zakona o bankama Federacije i ovog zakona kao i banke članice koje imaju dozvolu za rad od RSAB moraju do 31. decembra 2002. godine ili dana naknadno utvrđenog zakonom, ispuniti sve zahtjeve Zakona o bankama Republike Srpske i ovog zakona.

Poslije ovog datuma u entitetima, nijednoj banci neće biti dozvoljeno da zadrži svoje učešće u osiguranju depozita, a da ne ispunjava sve zahtjeve ovog zakona i Zakona o bankama.

Prije 31. decembra 2002. godine ili dana naknadno utvrđenog zakonom, primenjivat će se prijelazni zahtjevi koji su navedeni u članovima 29. i 30. ovog zakona.

Član 30. Učešće u članstvu u toku prijelaznog perioda

Svaka banka s dozvolom za rad od agencije za bankarstvo i koja ispunjava kriterije Agencije za članstvo navedene u članu 31. dužna je postati banka članica u toku prijelaznog perioda.

Banka, za koju je Agencija utvrdila, a Upravni Odbor Agencije je odobrio, kao kvalificiranu da postane bankom članicom u toku prijelaznog perioda bit će obaviještena o toj činjenici i dužna je dostaviti pismeni obrazac o obavještenju čiji sadržaj je utvrdila

Agencija. Osim toga, banka također dostavlja Agenciji primjerak posljednjeg revidiranog finansijskog izvještaja od eksterne revizije obavljenog u skladu s međunarodnim računovodstvenim standardima, ili početni bilans stanja za novootvorene banke.

Na zahtjev Agencije, i kao preduslov za članstvo u Fondu, Agencija za bankarstvo koja je izdala dozvolu za rad potvrdit će u pisanoj formi Agenciji da li je banka u toku prijelaznog perioda koja je u razmatranju za dobivanje statusa banke članice trenutno ocijenjena ocjenom 1., 2. ili 3. na kombinovanoj osnovi i bez individualne komponente ocjenivanja označene 5.

U toku prijelaznog perioda, od novoformiranih banaka zahtijeva se da Agenciji dostave dokaz o njihovoj sposobnosti da ispune kriterije za članstvo u osiguranju depozita za slijedeće tri finansijske godine od dana kada je banci odobrena dozvola za rad.

Agencija će odrediti koje su dodatne informacije odgovarajuće da podrže zaključak o pitanju kvalifikacije banke da učestvuje u programu osiguranja depozita u toku prijelaznog perioda. Ovo treba uključiti sve važne informacije koje je Agencija dobila prilikom svojih ispitivanja u smislu razmatranja dokumenata primljenih od banke ili putem "on-site" posjeta banci da potvrdi primljene informacije ili informacije primljene od jedne od agencija za bankarstvo iz njene supervizije nad bankom. Konačna odluka o pitanju članstva je isključiva nadležnost Agencije.

Član 31. Kriteriji za članstvo u toku prijelaznog perioda

Za učestvovanje u osiguranju depozita kao banka članica u toku prijelaznog perioda, banka mora ispuniti slijedeće kriterije, čije standarde određuje propis Agencije:

- a) kapital;
- b) likvidnost;
- c) kvalitet aktive;
- d) upravljanje;
- e) profitabilnost;
- f) računovodstveni standardi;
- g) rezerve.

Agencija će odrediti standarde kriterija za prijelazni period i ove kriterije odobrit će Upravni odbor Agencije i bit će objavljeni u "Službenom glasniku BiH".

Da bi učestvovala u osiguranju depozita kao banka članica u toku prijelaznog perioda, osim posjedovanja dozvole za rad od FBA ili RSAB, ili njihovog pravnog(ih) nasljednika, i ispunjavanja odredbi ovog zakona, banke moraju ispuniti slijedeće dodatne finansijske ili vlasničke kriterije:

- a) finansijske zahtjeve ustanovljene zakonom o bankama;
- b) većinsko privatno vlasništvo.

Osim navedenih kriterija, sve banke članice moraju dalje ispunjavati kriterije sigurnosti i boniteta koji je utvrdila relevantna agencija za bankarstvo.

Nijedna banka pod prinudnom upravom ne može aplicirati za učešće u članstvu.

U slučaju otkazivanja učešća banke članice u osiguranju depozita u toku prijelaznog perioda, odluka Agencije bit će konačna i obavezujuća i može se osporavati samo na Sudu Bosne i Hercegovine

Član 32. Prijelazne odgovornosti Agencije

Centralna banka i ministarstvo finansija entiteta imenuje, u roku 30 dana od dana stupanja na snagu ovog zakona, članove Upravnog odbora Agencije u skladu s članom 18.1 ovog zakona, a Upravni odbor Agencije imenuje, u roku 60 dana od dana stupanja na snagu ovog zakona, direktora Agencije i direktore organizacionih jedinica.

Agencija za osiguranje depozita Federacije i Agencija za osiguranje depozita Republike Srpske prestaje s poslovanjem u skladu s određenim entitetskim propisima u roku 60 dana od dana stupanja na snagu ovog zakona.

Upravni odbor Agencije ima punu odgovornost i ovlaštenje da provodi privremene aranžmane u skladu s ovim zakonom.

Pravilnik za vođenje prekršajnog postupka, koji donosi Upravni odbor Agencije, ostaje na snazi i primjenjuje se do donošenja Zakona o prekršajima, na nivou države.

Upravni odbor Agencije, u roku 60 dana od dana stupanja na snagu ovog zakona, poduzima slijedeće aktivnosti:

- a) uspostavlja jedinstven račun sredstava Agencije koji uključuje račune prethodnih entitetskih agencija za osiguranje depozita;
- b) započinje poslovanje sjedišta i organizacionih jedinica Agencije;
- c) donosi odluku o preuzimanju od Agencije prava, imovine, obaveza i zaposlenih prethodnih entitetskih agencija za osiguranje depozita;
- d) uspostavlja novi sveobuhvatni računovodstveni sistem i priprema opći bilans svih računa i izrađuje privremeni bilans stanja Agencije.

Upravni odbor Agencije, u roku 60 dana od dana stupanja na snagu ovog zakona potpisuje, ili potvrđuje sporazume koje su prethodno potpisale entitetske agencije za osiguranje depozita, sporazum s agencijama ili zemljama donatorima kojim se reguliraju, između ostalog, određena prava koja se dodjeljuju savjetodavnim članovima Upravnog odbora Agencija iz reda agencija ili zemalja donatora.

Član 33.
Zahtjevi Agencije u okviru novog Zakona

Banke koje učestvuju u osiguranju depozita u bilo kom entitetu na dan objavljivanja ovog zakona moraju ponovo potvrditi svoje članstvo prema kriterijima ovog zakona kako bi postale bankama članicama shodno ovom zakonu.

Agencija je dužna dostaviti prijedlog Statuta Agencije Upravnom odboru Agencije na usvajanje u roku 60 dana od dana stupanja na snagu ovog zakona i objaviti Statut Agencije u "Službenom glasniku BiH" u roku 90 dana od dana stupanja na snagu ovog zakona.

Svi propisi ili podzakonska akta koja su neophodna za podržavanje ovog zakona moraju biti pripremljeni i predloženi od Agencije i odobrena od njenog Upravnog odbora. Svi propisi i podzakonska akta koje usvoji Upravni odbor Agencije, objavljuju se u "Službenom glasniku BiH" u roku šest mjeseci od dana stupanja na snagu ovog zakona.

Član 34.
Dan stupanja na snagu novog zakona

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

PS BiH broj 73/02
18. jula 2002. godine
S a r a j e v o

PREDSJEDAVAJUĆI
PREDSTAVNIČKOG DOMA
PARLAMENTARNE SKUPŠTINE BiH
Mariofil Ljubić

PREDSJEDAVAJUĆI
DOMA NARODA
PARLAMENTARNE SKUPŠTINE BiH
dr. Nikola Špirić

